

Pastoor Hendrikstraat ta cambia cara

ORANJESTAD- Pastoor Hendrikstraat ta cambia cara y haya un nobo. Juan Castro ta e persona encarga cu e progreso di e trabou cu ta den man di e compania Arubaanse Wegenbouw.

Segun sr. Castro ta dunando e tokenan final prome cu entrega e proyecto na gobierno den careda di November. E problemanan cu e compania a confronta den ehecuion di embeyecemento di Pastoor Hendrikstraat tabata minimo y nan por a wordo solucionado basta rapido. E comunicado ta conta cu despues di a inicia cu e proyecto di embeyecemento di Pastoor Hendrikstraat. Esunnan pasando riba e caminda aki por a constata cu e trabou ta practicamente cla. Ta finalizando e rotonde riba e crusada banda di Filomena College y ex Ambulance bieu esaki ta pa por crea un miho fluho di trafico y asina garantisar un tiki mas seguridad.

E comunicado ta conta cu riba e ruta di Pastoor Hendrikstraat tin na total 7 polis drumi pa baha e velocidad di e vehiculonan riba e caminda. Tres di e plataforma nan aki ta bou construccion ainda. Na e crusada, mester kita e asfalt bieu y pone un capa nobo. E trabou di mas grandi cu nan ta riba dje awor ta e rotonde banda di Filomena College. Pero esaki ta marca caba, ta bashando santo pa duna forma, prome cu pone klinker riba dje. Castro a splica cu tur loke nan haci, ta wordo controla pa personal di DOW, kendenan a sigura cu awa no ta keda para mas den e areanan di antes. Esaki a nifica cu na algun parti mester a lanta e caminda, permitiendone un fluho normal. Un otro trabou cu a wordo haci ta riba e tuberianan di e sistema di riool. Antes esaki tabata di asbest, cu ta un material cu a cuminsa elimina y a pone tubonan di plastic. “E imagen di Pastoor Hendrikstraat a cambia completamente, a keda masha bunita mes y ta brinda mas seguridad,” Castro a comenta.

Habitantenan contento

Segun un otro comunicado di prensa, e habitantenan di San Nicolas ta contento cu e progreso di e bario. Glenda Tomasía Brown, un ciudadano bon conoci di pariba di brug, a comenta “e hen-

denan cu ta yega cerca mi ta comenta cu nan ta super gradici. Ora un luga ta bunita tur hende y cos ta funciona miho. Bo ta sali for di bocas y core riba un caya cu ta ‘smooth’ y bunita

” E ta inclui un rotonde na e skina grandi, banda di Ambulance bieu, cual tabata algo cu e hendenan a pidi pa aña caba, ya cu e crusada ta uno peligroso y na unda tabatin

varios accidente grandi y te hasta fatal. ‘Awor cu ta construyendo un rotonde chikito riba dje, e hendenan ta super feliz’

Percy Phelipa, e persona encarga cu e instalacion di YMCA riba Pastoor Hendrikstraat, tambe a expresa alegria pa e embeyecemento di e caya aki. Principalmente pasobra e ta un caminda cu esunnan cu ta yega YMCA ta haci uzo di dje. “Cambio semper ta bon,

principalmente si e ta pa mehoracion. Nos tin e speransa cu e caminda aki lo trece un cambio hopi positivo.” E comunicado ta bisa cu Phelipa a splica cu e caminda aki ta uno cu ta wordo hopi uza, no solamente pa automobilistanan, pero tambe pa muchanan di scol.

Tin biaha, el a bisa, cu man na curason nan ta mira e menornan crusa caya. Tin un

falta di comprension cerca e chauffeurnan pa esunnan cu ta cana na pia, pa cual husto dilanti e instalacionnan di YMCA tabatin diferente accidente, alcansando mucha. “Nos ta spera cu e cambio lo conscientisa e automobilistanan cu nan mester baha velocidad, y recorda nan cu nan ta riba un caminda di hopi scol, e ta wordo considera e ruta di scolnan di San Nicolas,” Phelipa a bisa. □